



АКАФИСТ

СВЯТОМУ
ВЕЛИКОМУЧЕНИКУ
ГЕОРГИЮ ПОБЕДОНОСЦУ



Тропарь, глас 4

Я́ко плéнных свободíteль / и ни́щих
защítитель /, немощствую́щих врач /,
правосла́вных побóрниче /, победо-
но́сче, великомúчениче Геóргие /, моли́
Христа́ Бо́га // спасти́ся душа́м на́шим.

Кондак, глас 4

Воздéлан от Бо́га /, показáлся еси́
благочéстия дéлатель честнéйший /,
добродéтелей рукоя́ти собра́в себе /:
се́яв бо в слезáх, весéлием жне́ши /,
страда́льчествовав же крóвию /, Христа́
прия́л еси́ // и моли́твами, свя́те,
твои́ми всем подаéши прегрешéний
прощéние.



Акафист святому великомученику Георгию Победоносцу

Кондак 1

Взбранному воеводе и Победоносцу
Георгию составим похвалу, яко ходатаю
нашему и скорому помощнику: ты же,
святый великомучениче, яко имеяй
дерзновение ко Господу, от всяких нас
бед свободи, да зовем ти:

Радуйся, Георгие, великий Победо-
носче.

Икос 1

Ангелов Творец и вся твари Содетель,
явивый тя Церкви Своей веры поборника
и за веру непобедимаго страстотерпца,
внушает нам за подвиги



**страданий твоих восхваляти тя, святе
Георгие, сице:**

**Радуйся, до конца Иисуса Сына
Божия возлюбивый; радуйся, за
имя Его с любовью душу свою поло-
живый.**

**Радуйся, исповедниче, от Бога
призванный; радуйся, подвиж-
ниче, Божиею благодатию
прославленный.**

**Радуйся, Ангелов сожителю;
радуйся, пророков равностоятелю.**

**Радуйся, Георгие, великий Победо-
но́сче.**

Кондак 2

**Видя гонение нечестивых на
христианы, не убоялся еси козни их
и мучительства, богомудре, но яко
добрый воин Христов, вся своя нищим
раздав, волею потекл еси на совет их**



**непра́ведный, Христу́ вождю́ и Бо́гу
своему́ поя: Аллилу́иа.**

Икос 2

**Разу́мно уразуме́в Еди́наго Бо́га,
в Три́ех Ипоста́сах боголе́пно покла-
ня́емаго, твёрдым умом испове́дал еси́
Его́ на собори́щи нечести́вых и та́ко
обличил еси́ безу́мнаго царя́ безу́мное
поклонёние тва́ри. Сего́ ра́ди за твоё
высо́кое любомудрие приими́ от нас,
Геор́гие, усердныя похва́лы:**

**Ра́дуйся, Еди́наго и́стиннаго Бо́га
пропове́днице; ра́дуйся, Пресвяты́я
Тро́ицы ве́рный защи́тнице.**

**Ра́дуйся, ве́лию правосла́внаго испо-
ве́дания та́йну неве́рным показавый;
ра́дуйся, и́дольскаго служёния
пре́лесть обличивый.**

**Ра́дуйся, рито́ре Бо́жий; ра́дуйся,
ветие, премудрости исполненный.**



Ра́дуйся, Геóргие, вели́кий Победоно́сче.

Кондак 3

Си́ла Бо́жия, просвеща́ющая вся́каго челове́ка, грядúщаго в мир, и в темни́це тя стра́ждущаго посети́ла естъ, смиренномúдре Геóргие: понéже ты вся жити́я сегó тлénная, я́ко умéты презрév, еди́ному Христú прилепи́лся еси́, да за и́мя Его́ до́бре воинствовав, сподóбишия Тому́ со А́нгелы вéчно воспевáти: Аллилу́иа.

Икос 3

Име́я ум и се́рдце, Ду́хом Святы́м озарénныя, ты по внуше́нию Его́ поревновáл еси́ подвизáтися за и́мя Христово, до крóве стоя́бо мúжественно в вéре, обличил еси́ вознесénную нечестíваго собóрища горды́ню. Сегó ра́ди хва́лим тя, всемúдре Геóргие, си́це:





**Ра́дуйся, щіте, воздвігну́тый на
охране́ние благоче́стия; ра́дуйся,
мечу́, подъя́тый на посече́ние нече́-
стия.**

**Ра́дуйся, сто́лпе ве́ры; ра́дуйся, стено́
и утвержде́ние Христо́вы Це́ркви.**

**Ра́дуйся, ве́рных удобре́ние; ра́дуйся,
неве́рных страх и посрамле́ние.**

**Ра́дуйся, Гео́ргие, вели́кий Победо-
но́сче.**

Кондак 4

**Безу́мный мучи́тель, ды́шащий на
тя убийством, страсоте́рпче Гео́ргие,
жа́ждал бо кро́ве твоя́, я́ко пес а́лчный,
повелева́я распя́ти на колесе́ те́ло твоё
и зле́йшим му́кам преда́ти; ты же,
возмога́я о Го́споде, с твёрды́м упова́нием
к Бо́гу взыва́л еси́: Аллилѹиа.**



Икос 4

Слы́шавше от тебе́ Диоклети́ан и
жрецы́ идо́льстии словеса́ премудро́сти,
распыха́хуся на тя зло́бою, па́че же егда́
рекл еси́: «О царю́ мучи́телю! Почто́
мя всу́е истязу́еши? Мне бо е́же жи́ти,
Христо́с, и е́же умре́ти, приобре́тение.
Тру́дно ти есть проти́ву рожна́ прати́».
Сего́ ра́ди мы взыва́ем ти, великоиме́-
ните Гео́ргие, си́це:

Ра́дуйся, за му́жественное испо-
вѣдание ве́ры на колесе́ кровь свою́
пролиа́вый; ра́дуйся, кро́вию свое́ю
торжествó ве́ры возвели́чивый.

Ра́дуйся, Апóстолов соревни́телю;
ра́дуйся, во́льным Христо́вым
Страсте́м подража́телю.

Ра́дуйся, побóрнице ве́ры непоко-
леби́мый; ра́дуйся, страсоте́рпче,
адамáнта тверде́йший.



Ра́дуйся, Геóргие, вели́кий Победоно́сче.

Кондак 5

Боготéчной звездé подóбен был еси́ Геóргие, чудéсным бо от А́нгела исцелéнием и вíдимым от колесá отрешéнием научíл еси́ неверных вéровати в Трóицу Единосúщную и Той кúпно с тобо́ю воспева́ти: Аллилúиа.

Икос 5

Вíдеша наро́ди чудеса́ síлы Бóжия, я́ве на тебе́ быва́емья, с крóтостию учéние Христóво от тебе́ прия́ша и возопи́ша, глаго́люще: «Во́истину вели́к Бог христиа́нский!» Сего́ ра́ди и мы, восхваля́я тя, достосла́вне Геóргие, взыва́ем си́це:

Ра́дуйся, светоно́сным спасéния слóвом тьму неверия́ разгна́вый;



**ра́дуйся, мученическим ве́ры испо-
вѣданием невѣрныя ко Христу́ обра-
тѣивый.**

**Ра́дуйся, легио́ны вои́нов земных
в небѣсное во́инство предводи́й;
ра́дуйся, яко́ во́ин Христовъ с небѣс-
ными во́и пребыва́яй.**

**Ра́дуйся, ратоборцев сла́во; ра́дуйся,
пресвѣтлаго мученическаго ли́ка
красото́.**

**Ра́дуйся, Геор́гие, вели́кий Победо-
но́сче.**

Кондак 6

**Проповѣдником ѣстины, духо-
но́сным Апóстолом поревнова́в,
кресто́м ми́ру распя́лся еси́, страсто-
тѣрпче; се бо, яко́ Ио́на во чре́во кѣтово,
в пещь нерастворѣнныя известї́ стремг-
ла́в ввѣржен был еси́, да просла́вится**



тебѣ ради дѣвнѣй во святѣхъ Господѣ,
Емуже ты и в ровѣ известнемъ, яко во
храмѣ славы, умно зывал еси: Алли-
луиа.

Икос 6

Возсиявый в тридневномъ Своѣмъ
от гроба востании всеильный ада
и смерти Победитель Иисусъ спасе ты от
адова истлѣния, страсотѣрпче Георгіе:
по трѣхъ бо днѣхъ обрѣтѣша ты в ѣзвесті
жива и в воздеяніи рукъ поюща Бѣга;
сего ради вельми пристрашни бѣша
и ужасѣшася. Мы же, радующеся,
восписуемъ ти побѣдную песнь:

Радуйся, позорнымъ в ѣзвестный
ровъ низверженіемъ, вознесенную
дѣвола гордыню низложивый;
радуйся, дѣвнымъ от Бѣга спасеніемъ
зверство мучителей побѣдивый.

Радуйся, яко незлѣбив сый, за



творивших ти напасть молился еси, яко за благодворцев; радуйся, яко о обращении их, яко же Павел о евреех, болезновал еси.

Радуйся, мужу желаний; радуйся, сосуде избранный.

Радуйся, Георгие, великий Победоносче.

Кондак 7

Хотяй всячески уловити сердце твоё к прелести идол, нечестивый мучитель умышляет прельстити тя волшебными чарованиями; ты же, богоизбранне, с Давидом восклицая: «О Бóже спасение моё и слава моя», верно Тому пел еси: Аллилуиа.

Икос 7

Новое показá зло лукавый óный сатаны́ служитель Диоклетиán, егда́ в безумной своей ко идолом ревности



повелé напойти тя, Геóргие, я́дом; ты же испо́лнен сый véры и упова́ния, а́ще и сме́ртное испи́л, о́баче без вреда́ пребы́л еси́, богохва́льне, те́мже и мы вопи́ем ти:

Ра́дуйся, я́ко во упова́нии на Бо́га Жи́ва не посрами́лся еси́; ра́дуйся, я́ко мучи́теля ни во что́же вмени́л еси́.

Ра́дуйся, бесо́в отгна́телю; ра́дуйся, волше́бныя ко́зни разруши́телю.

Ра́дуйся, я́ко тобо́ю дивен Бог во святы́х Свои́х явля́ется; ра́дуйся, я́ко тобо́ю благоче́стно и́мя Христо́во прославля́ется.

Ра́дуйся, Геóргие, вели́кий Победоно́сче.

Кондак 8

Стра́нный и стра́шный сове́т бысть от не́коего волхва́ нечестивому́ царю́, да



повелит ти, в доказательство правости веры Христовой, словом воскресити мёртваго; ты же, Георгие, ничтоже сумняся, воспевал еси Тому, Иже несть Бог мёртвых, но Бог живых: Аллилуиа.

Икос 8

Всежеланный и Сладчайший Иисус, Егже ты всею душею и всем сердцем возлюбил еси, всеблаженне Георгие, слыша тёплое веры твоея́ моление, вскоре повеле по слову твоему́ воскреснути мёртвому, прославления ради Имени Своего́ и верных утверждения, неверным же и ослеплённым на удивление и богопознание. Сего́ ради по долгу вопиём ти:

Радуйся, яко Господь сил дивная на тебе явил есть; радуйся, яко мёртваго тобою от гроба воскресил есть.

Радуйся, ослеплённому волхвумное веры прозрение даровавый;



**ра́дуйся, мно́гим, Христа́ ра́ди
пострада́вшим, во свята́я свята́х
пу́ть показáвый.**

**Ра́дуйся, Рíма удивлénие; ра́дуйся,
христиáнского рóда возвышénие.**

**Ра́дуйся, Геóргие, вели́кий Победо-
но́сче.**

Кондак 9

**Вси А́нгели восхваля́ша Бо́га, даро-
ва́вшаго ти таково́е му́жество, Геóргие,
я́ко и в темни́чном заточéнии не преста-
ва́л еси́ моли́твенно бо́дрствовать.
Сего́ ра́ди, я́ко вели́кий та́инник Бо́жия
благодáти, удостóился еси́ ви́дети
в видéнии Го́спода, венце́м нетлénия
главу́ твою́ венча́юща, да и мы с тобо́ю
вопи́ем: Аллилу́иа.**

Икос 9

**Витíи многовещáннии рíторскими
сво́ими язýки не возмо́гут изрещи́ тебе́**



достойныя хвалы, Георгіе, многих
ради твоих подвигов и болезней, ихже
за Христа и Церковь подъял еси волею.
Сего ради и мы, недоумя восхваляти
тя по достоянію, воспеваем сїце:

Радуйся, вольным за Христа
и Церковь страданіем вѣтхаго
в себѣ Адама распявый; радуйся, за
дѣблестное страданіе венѣц правды
от руки Господни приявый.

Радуйся, правило ревности благо-
честивыя; радуйся, образе нищеты
духовныя.

Радуйся, яко не себѣ, но Единому
Богу дѣбре угодил еси; радуйся, яко
за Христа на многообразныя смѣрти
готов был еси.

Радуйся, Георгіе, великий Победо-
носче.



Кондак 10

Спасти́ хотя́ дѹши во тьме идолослужѣния погиба́ющих, боголюбче Геóргие, ты, ревнѹя, поревновáл еси́, я́ко Илия́ по Бóзе: вшед бо во храм ѱдо́льскый, си́лою Бóжиею разгна́л еси́ бѣсы, сокруши́л ѱдолы, посрами́л жрецы́ и, я́ко победíteль, не с челове́ки, но со А́нгелы пел еси́ Бóгу: Аллилу́иа.

Икос 10

Стены́ бесчу́вственнее окаме́ненный се́рдцем мучíteль твой, Геóргие, не уразуме́ Бóга, я́вѣ тобо́ю чудодѣ́йствующа, но до конца́ пребы́л еси́, я́ко а́спид, затыка́яй ѹши свой. Сего́ ра́ди повеле́ усещи́ ты на позóрищи во главѹ, я́ко злоде́я; ты же, болѣзну́я о поги́бели душі́ егó, радóстно прия́л еси́ кончи́ну, за ню́же мы тя ублажа́ем любóвию си́це:



Ра́дуйся, ве́ру, наде́жду и любя́
до конца́ сохрани́вый; ра́дуйся, во
успе́нии твоём мно́гия и вели́кия
чудеса́ сотвори́вый.

Ра́дуйся, ору́жием благоволе́ния
Бо́жия венча́нный на земли́;
ра́дуйся, сла́вою и велеле́пием укра-
ше́нный на Небеси́.

Ра́дуйся, челове́че Бо́жий; ра́дуйся,
до́брый во́ине Христóв.

Ра́дуйся, Геóргие, вели́кий Победо-
но́сче.

Кондак 11

Пе́ние Пресвяте́й Тро́ице па́че ины́х
возда́л еси́, святы́й великомучениче
Геóргие, не сло́вом то́чию и умóм, но
живы́м всего́ себя́ в же́ртву принесé-
нием: подража́я бо распя́тому за ны
непорóчному А́гнцу Христóу, положи́л
еси́ ду́шу свою́ за дру́ги своя́ во́лею.



**Тёмже ўбо а́ще недовольни есмѣ
к похвалѣнiю таково́я твоея́ дѣблести,
бѣльше бо сея́ любвѣ никто́же имать,
обаче благодарни сѹще, поѣм Дѣвному
во святѣхъ: Аллилу́иа.**

Икос 11

**Светопріѣмный светѣльник ѣстин-
наго Свѣта сѹщим на землѣ являѣшися,
богоизбранне Геѣргіе, просвещаѣши бо
сердцá вѣрныхъ и к рáзуму Божѣствен-
ному вся наставляѣши, поуча́я и нас
вѣсело взыва́ти:**

**Ра́дуйся, я́ко в пресвѣтлыхъ а́нгель-
скихъ черто́зехъ вселяѣшися; ра́дуйся,
я́ко не в гадáнии, но лицѣмъ к лицу́,
Невечѣрнаго Трѣичнаго Свѣта прича-
щаѣшися.**

**Ра́дуйся, ни́щихъ пита́телю и оби́-
димыхъ зашѣтнице; ра́дуйся, немощ-
ныхъ врачѹ́ и царѣй побѣрнице.**



Ра́дуйся, правосла́вным во́ином
во бра́нех спобо́рнице; ра́дуйся,
о спасе́нии греше́шников те́плый хода́-
таю.

Ра́дуйся, Гео́ргие, вели́кий Победо-
но́сче.

Кондак 12

Благода́ть, да́нную ти от Бо́га,
веду́ще, па́мять твою́ пра́зднуем, вели-
комучени́че Гео́ргие, и с усер́дным
молéнием к чудотво́рному о́бразу
твоemú притека́юще, твоёю всеси́льною
о Го́споде по́мощию, я́ко необори́мую
стенóю, огражда́емся. Сего́ ра́ди восхва-
ляя́ тя, усер́дно зове́м Бо́гу: Аллилу́иа.

Икос 12

Сла́вную кончи́ну твою́ пою́ще,
ёюже возвели́чился еси́, я́ко до́брый
во́ин Христо́в, мо́лим тя, страсотёрпче
Гео́ргие: бу́ди нам во всем ко бла́гу



**помощниче и услыши ны, усердно
взывающих ти:**

**Радуйся, яко тобою Церковь верных
просвещается; радуйся, яко имя твоё
и между неверными прославляется.**

**Радуйся, дивная исповедников
слава; радуйся, высокая мучеников
похвало.**

**Радуйся, телес наших целбниче;
радуйся, о душах наших молитвен-
ниче.**

**Радуйся, Георгие, великий Победо-
носче.**

Кондак 13

**О всеблаженный и святой велико-
мучениче Георгие, прими сие наше
хвалёбное пение и избави нас от всякого
зла твоим тёплым к Богу ходатайством,
да с тобою воспеваем: Аллилуиа.**

Этот кондак читается трижды.



Икос 1

А́нгелов Творе́ц и всея́ тва́ри Соде́-
тель, яви́вый тя Це́ркви Сво́ей ве́ры
поборника и за ве́ру непобеди́мага
страстоте́рпца, внуша́ет нам за по́двиги
страда́ний твои́х восхваля́ти тя, свя́те
Геор́гие, си́це:

Ра́дуйся, до конца́ Иису́са Сы́на
Бо́жия возлю́бивый; ра́дуйся, за
и́мя Его́ с любóвию ду́шу свою́ поло-
жи́вый.

Ра́дуйся, испове́днице, от Бо́га
призва́нный; ра́дуйся, подвѣж-
нице, Бо́жиею благода́тию
просла́вленный.

Ра́дуйся, А́нгелов сожи́телю;
ра́дуйся, проро́ков равностоя́телю.

Ра́дуйся, Геор́гие, вели́кий Победо-
но́сче.



Кондак 1

Взбранному воеводе и Победоносцу
Георгию составим похвалу, яко ходатаю
нашему и скорому помощнику: ты же,
святый великомучениче, яко имеяй
дерзновение ко Господу, от всяких нас
бед свободи, да зовем ти:

Радуйся, Георгие, великий Победо-
носе.

Молитва

О всехвальный, святый великомучениче и чудотворче Георгие! Призри на ны скорою твоею помощью и умоли Человеколюбца Бога, да не осудит нас, грешных, по беззакониям нашим, но да сотворит с нами по велицей Своей милости. Не презри моления нашего, но испроси нам у Христа Бога нашего тихое и богоугодное житие, здравие



же душевное и телесное, земли плодородие и во всем изобилие, и да не во зло обратим даруемая нам тобою от Всещедраго Бога, но во славу святаго Имени Его и в прославление крепкаго твоего заступления, да подаст Он стране нашей и всему боголюбивому воинству на супостаты одоление и да укрепит непремняемым миром и благословением. Изряднее же да оградит нас святых Ангел Своих ополчением, во еже избавитися нам по исходе нашем из жития сего от козней лукаваго и тяжких воздушных мытарств его и неосужденным предстати Престолу Господа славы. Услыши нас, страстотерпче Христов Георгие, и моли за ны (имена) непрестанно Триипостаснаго Владыку всех Бога, да благодатию Его и человеколюбием, твоею же помощию и заступлением обрящем милость со



**А́нгелы и Арха́нгелы и все́ми святы́ми
одесну́ю Правосу́днаго Судии́ ста́ти
и Того́ вѣну сла́вити со Отце́м и Святы́м
Ду́хом ны́не, и прѣсно, и во ве́ки веко́в.
Ами́нь.**

Величание

**Велича́ем тя, / страстоте́рпче
святы́й великому́чениче и победоно́сче
Геор́гие, / и чтим честна́я страда́ния
твоя, // я́же за Христа́ претерпе́л еси́.**



Расписание чтения акафистов

ПН	2:00, 8:00, 14:00, 20:00	Михаилу Архангелу
	2:30, 8:30, 14:30, 20:30	Ангелу-Хранителю
	3:00, 9:00, 15:00, 21:00	прп. Сергию Радонежскому
ВТ	2:00, 8:00, 14:00, 20:00	прор. Иоанну Предтече
	2:30, 8:30, 14:30, 20:30	муч. Авраамию Болгарскому
	3:00, 9:00, 15:00, 21:00	прп. Серафиму Саровскому
СР	2:00, 8:00, 14:00, 20:00	Б. М. «Неупиваемая Чаша»
	2:30, 8:30, 14:30, 20:30	Б. М. «Умягчение злых сердец»
	3:00, 9:00, 15:00, 21:00	Б. М. «Всецарица»
ЧТ	2:00, 8:00, 14:00, 20:00	свт. Николаю
	2:30, 8:30, 14:30, 20:30	вмч. и Победоносцу Георгию ←
	3:00, 9:00, 15:00, 21:00	блж. Матроне Московской
ПТ	2:00, 8:00, 14:00, 20:00	Б. М. «Взыскание погибших»
	2:30, 8:30, 14:30, 20:30	муч. Гурию, Самону, Авиву
	3:00, 9:00, 15:00, 21:00	свт. Спиридону Тримифунтскому
СБ	2:00, 8:00, 14:00, 20:00	вмч. и целителю Пантелеимону
	2:30, 8:30, 14:30, 20:30	За единоумершего
	3:00, 9:00, 15:00, 21:00	Б. М. «Казанская»
ВС	2:00, 8:00, 14:00, 20:00	Покрову Божией Матери
	2:30, 8:30, 14:30, 20:30	Б. М. «Нечаянная Радость»
	3:00, 9:00, 15:00, 21:00	Слава Богу за всё